

每週經課朗誦經文(巴克禮漢羅/教羅)2014/02/02

共同經課 - 1

彌迦書六章一節~八節

1 Taⁿ tiòh 聽耶和華所講 ê：起來，你 tiòh tī chiah-ê 山 ê 面前辯論，hō chiah-ê 山嶺聽見你 ê 聲。2 Chiah-ê 山 kap 地堅固 ê 根基 ah，tiòh 聽耶和華爭辯 ê 話；因為耶和華 beh kap 伊 ê 百姓爭辯，koh beh kap 以色列排情理。3 我 ê 百姓 ah，我 bat 對你做甚麼？我有甚麼 hō 你為難？你 thang 對我指出。4 我 bat choā 你出埃及地，救贖你脫離做奴才 ê 厝；差摩西、亞倫、Bí-lī-àm tī 你 ê 面前。5 我 ê 百姓 ah，lín tiòh 記得 Mô-ap 王 Pa-lèk 所計謀 ê，kap Pí-jīⁿ ê kiáⁿ Pa-lân 應伊 ê 話，tùi Sip-têng 到 Kiat-kah ê 事，thang hō lín 知耶和華所行 ê 公義。6 我就近耶和華，跪拜至高 ê 上帝，tiòh 用甚麼 ah？tiòh 用燒祭 á 是滿年 ê 牛 á 來就近祂 ah？7 耶和華歡喜千千隻 ê 公羊 mah？á 是萬萬條溪 ê 油 mah？我 tiòh 為家己 ê 罪過獻我 ê 大 kiáⁿ mah？為 tiòh 我心內 ê 罪惡，獻我本身所生 ê mah？8 人 ah，伊 bat 指示你甚麼是好；耶和華 ài 你甚麼？獨獨 ài 你行公義，心存憐憫，謙卑 kap 你 ê 上帝相 kap 行。

共同經課 - 2

詩篇十五篇

1 大衛 ê 詩。1) 耶和華 ah，chī-chūi 會寄腳 tī 你 ê 布棚？Chī-chūi 會 khiā 起 tī 你 ê 聖山？:2 就是所行正直，所做公義，心內講誠實 ê 人。3 伊無用舌加誣人，無 pháiⁿ 款待朋友，人毀謗厝邊，伊無四界謠。4 伊 ê 目矚看輕匪類，尊重敬畏耶和華 ê 人。伊 chiū-choā，雖 bóng 家己刻虧，亦無變換。5 伊銀借人無為 tiòh 利息；無受 pò 賂來害無罪 ê；行 chit 號事 ê 人永永無搖 choah。

共同經課 - 3

哥林多前書一章十八節~三十一節

18 因為十字架 ê 道理，沉淪 ê 人看做蠢，咱得救 ê 人看做上帝 ê 權能。19 因為有記載講，我 beh 滅無智慧 ê 人 ê 智慧，也 beh 棄 sak 聰明 ê 人 ê 聰明。20 智慧 ê 人 tī tá-lòh？經學士 tī tá-lòh？chit 世間好辯論 ê 人 tī tá-lòh？上帝 kiám m̄ 是 hō 世間 ê 智慧變成蠢？21 因為世間既然 tùi in ê 智慧 m̄-bat 上帝，上帝就歡喜 tùi 所宣傳 ê 蠢來救 chiah-ê 信 ê 人；這 lóng 是上帝 ê 智慧。22 因為猶太人求神蹟，希利尼人 chhē 智慧。23 但是阮傳釘十字架 ê 基督，tùi tī 猶太人是塞礙，tùi tī 外邦人是愚蠢；24 但是 tùi tī 受召 ê，無論猶太、希利尼，基督做上帝 ê 權能，上帝 ê 智慧。25 因為上帝 ê 愚蠢比人 khah 智慧，上帝 ê 軟弱比人 khah 勇壯。26 兄弟 ah，試看 lín ê 受召，照肉體有智慧 ê 無 joā-choē，有權力 ê 無 joā-choē，有尊貴 ê 也無 joā-choē；27 但是上帝揀世間 ê 蠢 ê，來 hō 智慧 ê 人見笑；上帝也揀世間 ê 軟弱 ê，來 hō 勇壯 ê 見笑；28 上帝也揀世間卑賤 ê，人看 m̄ 上目 ê，以及 hiah-ê 無 ê，來廢無 hiah-ê 有 ê；29 hō 見若有肉體 ê tī 上帝 ê 面前無 thang 誇口。30 但是 lín tùi 上帝得 tiòh tiàm-tī 基督耶穌；伊 tùi 上帝替咱成做智慧，koh 做義、成聖，以及贖回；31 致到照所記載講，誇口 ê 人 tiòh 用主來誇口。

共同經課 - 4

馬太福音五章一節~十二節

1 耶穌看見 hiah-ê kui 陣 ê 人，就 peh 上山；已經坐，伊 ê 學生就近伊。2 伊嘴教示 in 講，3 心內 sòng-hiong ê 人有福氣，因為天國是 in ê。4 憂悶 ê 人有福氣，因為 in beh 受安慰。5 溫柔 ê 人有福氣，因為 in beh 承接土地。6 Iau 嘴乾欣慕義 ê 人有福氣，因為 in beh 得 tiòh 飽。7 憐憫人 ê 人有福氣，因為 in beh 得 tiòh 憐憫。8 清氣心肝 ê 人有福氣，因為 in beh 看見上帝。9 hō 人和平 ê 人有福氣，因為 in beh 稱做上帝 ê Kiáⁿ。10 為 tiòh 義 bat 受 khún-tiòk 人有福氣，因為天國是 in ê。11 為 tiòh 我，人 chiah loé 罵 lín，khún-tiòk lín，毀謗 lín 萬項 ê pháiⁿ，lín 就有福氣。12 Tiòh 歡喜快樂，因為 lín tī 天裡 ê 報賞是大；因為 lín 以前 ê 先知人，人亦 án-ni khún-tiòk in。